

編號 3 號

【阿媽个鹹糜】黃旭霞原作

起屋个師傅還過做小工个叔姆在禾埕項無閒泊杈。師傅交代叔姆愛摺磚仔淋濕來起屋時正好用，阿媽看叔姆無閒在該攪沙仔，走去牽水管仔來淋磚仔，佢就跔等阿媽在旁脣搞水。

阿爸在外地上班無法度輒輒轉屋下，屋下大細項个事情全部係阿媽一儕人捱起來做到兩頭烏，佢俚毋知頭天个三姊妹，想著會有新屋好歇、有自家个間房好戴，心肝肚不時都固有歡喜个心情。成時阿媽喊來搵手搬磚仔、疊磚仔、攞水、攞茶……，佢摺兩個阿哥定著會去搵手！

下晝兩點空仔，阿媽在灶下無閒，耳公聽著阿媽拿菜刀切豬肉、香菇、芹菜，洗鑊頭、開瓦斯……，哇！阿媽愛開始煮點心哩！佢恬恬仔去灶下看阿媽煮點心。阿媽對豬油盞仔挖兜仔豬油放落鑊肚，續等放浸過个蝦米、香菇來敲香，炒出香味過後放切好个竹筍，炒一下仔，正放洗淨个米共下過炒，浸過蝦米同香菇个水乜無打爽，滴兜仔豆油後就同滾水共下倒落去煲糜哩！差毋多半點零鐘邊仔糜就煲好咗，毋過糜燒燒仔，阿媽就同歸鑊

仔个糜沾¹在大面盆裡肚，分糜莫恁燒。

「阿霞！搵手撿碗筷，放到禾埕个矮桌仔項。」

聽著阿媽喊，佢遽遽排好碗筷，阿媽就喊佢三姊妹入去旁脣个矮屋肚搞。阿媽講：「師傅食點心，細人仔毋好坐在脣頭看人食，恁樣無禮貌。」行入矮屋肚佢就拿細凳頭仔來墊腳，對細窗門仔偷看師傅佢兜食點心，老師傅添第三碗，做小工个叔姆也添第二碗，佢心肝肚當緊張，肚屎咕嚕咕嚕个聲也毋會輸入。阿媽煲到恁大鑊个鹹糜就會無咧！吾个嘴，毋知幾時嘎翹到半天高。

佢遽遽走去灶下，該央時阿媽去收該伸無兩碗个鹹糜咗，阿媽喊佢去搵手收碗筷，佢毋甘願，慢慢仔行、慢慢仔做，碗筷放在灶下就愛走咧！阿媽講：「去拿碗來裝。」原來，阿媽煲好鹹糜，早就有留兜仔分三個細人仔咗。

佢遽遽拿碗去裝糜，這下就顧毋得該下發關个面子咧！鼻公摺嘴愛開始無閒哩啲！

一碗好食个鹹糜，有香菇、蝦米、竹筍、靚豬肉、芹菜，還過阿媽惜子女个心。還細時節佢食毋多出來，這下佢自家做阿媽咧，特別感受得著這一碗鹹糜个好味緒！

¹ 沾：音 dem¹；把物品微微浸泡於水面。